

# Powšitkowne WOZJEWJENJA

njedźelu, 15. nowembra 2020

## Wusyłanje Božeje mše live

Serbskorěčnu Božu mšu móža wěriwi tutu njedźelu, 15. nowembra, znowa jako livestream w interneće scěhować. Dopoldnja w 9 hodź. přenjese so wona z Chróšćanskeje cyrkwyje. Link na nju je na internetowej stronje [www.posol.de](http://www.posol.de) podaty.

## W Zdźěri žane kemše

Boža mša w Zdźěri tutu njedźelu, 15. nowembra, njebudže. To wozjewi Radworski farar Beno Jakubaš.

## W starowni trjebaja nuznje pomoc

Dom swjateje Ludmile w Chróścicach trjeba k dohladowanju wobydlerjow nuznje pomoc. Koronoweje pandemije dla je tam tójšto sobudźelarjow wupadnyło. Štóž ma nazhonjenja w hladanju starych a chorych ludźi a by w starowni wupomhać chcył, njech přizjewi so pola wjednistwa domu pod telefonowym číslom (03 57 96) 9 47 30.

## Zetkanje samostejacych wupadnje

Planowane zetkanje samostejacych wutoru, 1. decembra, w Smochčanskim kubłanišću swjateho Bena koronoweje pandemije dla wupadnje. Nawodnica Monika Kralowa so nadźija, so budže přenje zetkanje klětu w měrcu zaso móžne.

## Adwentny kalender za dźěći

Dekanatne dušepastyrstwo za dźěći we Worklecach poskići lětsa adwentny kalender za dźěći. Wšědnje dóstanu wona z póštu adwentne woknješko připóslane. Protyčka je w třoch wariantach za pěstowarske dźěći kaž tež za šulerjow 1. do 4. lětnika a 5. do 8. lětnika připrotowana. Zajimcy njech so prošu hač do srjedy, 25. nowembra, přez link, kiž je pod [www.posol.de](http://www.posol.de) podaty, přizjewja. Nadrobniše informacije dóstanu woni we Worklecach, telefonowe číslu (03 57 96) 8 87 07, mailowa adresa [worklecy-kise@gmx.de](mailto:worklecy-kise@gmx.de).

## Wo česćowanju swjateho Bosćana

Wustajeńcu wo česćowanju swjateho Bosćana w Chróšćanskej wosadze móža sej zajimcy dlěje hač dotal planowane, mjenujcy hač do njedźele, 6. decembra, w Budyskej tachantskej cyrkwi wobhladać. Přístupna je wona za čas wotewrjenja simultaneje cyrkwyje wot pónđzele do soboty wot 10 do 16 hodź. a njedźelu wot 12 do 16 hodź.

## Pytaja noweho tachantskeho kantora

Budyska tachantska wosada pyta noweho kantora. Do jeho nadawkow słuša mjez druhim přewjedjenje a planowanje duchowneje hudźby a koncertow, prawidłowna služba jako organist a wumělske nawjedowanje tachantskeho chóra. Wuměnjenje přistajenja je mjez druhim wotzamknjeny studij katolskeje cyrkwinskeje hudźby. Zajimcy měli swoje požadanje hač do pjatka, 15. januara, pisomnje w personalnym wotrjedze biskopskeho ordinariata, Käthe-Kollwitz-Ufer 84, 01309 Drježdźany, zapodać abo je na mailowu adresu [bewerbung@bddmei.de](mailto:bewerbung@bddmei.de) pósłać. Nadrobne wupisanje džěłoweho městna je pod [www.posol.de](http://www.posol.de) wozjewjene.

## **TCM podpěra dušepastyrski projekt fararja dr. Dzikiewicza**

Dary za Pólsku hromadža so hakle klětu

Towarstwo Cyrila a Metoda z.t. (TCM) chce ze swojej akciju „Łužica pomha“ tónkróc projekt fararja dr. Daniela Dzikiewicza, kotryž je dobre džewjeć lět w Chróscicach skutkował, financielnje při twarje wosadnicy we Wojdatach podpěrać. Tu trjeba wón, zo by w swojej wosadže z mnohimi młodymi swójbami – lětsa mějachu 80 přenjowoprawjenskich džěci a runje telko křćeńcow – porjadnje pastoralnje skutkować móht. Wobšěrnje je projekt w Katolskim Posole z 25. oktobra wopisany. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Litawska“ přepokazać. Štóz sej darowansku kwitowanku přeje, měł swoju dospołnu adresu zdžělić. Předsyda TCM Jurij Špitank skedźbnja na to, zo towarstwo w akciji „Łužica pomha“ koronoweje krizy dla lětsa nazymu za Pólsku dary njehromadži, kaž je wone to zašle lěta činiło. Dalokož móžno, ma so to klětu nalěto nachwatać.

## **Hromadža hodowne pakćiki džěcom a swójbam w Čěskej a Bołharskej**

Towarstwo swjateje Filomeny z.t. chce tež lětsa džěci a swójby w čěskim Dolním Podluží kaž tež w bołharskim Razgradže a wokolnych wsach z hodownymi pakćikami zwjeselić. Jich wobsah njeje předpisany, móžne pak su hrajki, pisanske materialije, slódkosće abo kakaw. Za spomóžne ma wone, jeli bychu pakćiki nalěpk měli, za koho su myslene, na přikład „swójba“, „holca 14–16 lět“ abo „hólc 0–4 lět“. Wotedać móža so pakćiki wot pónđzele do štwórtka, 23. do 26. nowembra, stajnje wot 17 do 18 hodž. w Smjerdžečanskim kulturnym domje. W tym času přijimuju tohorunja počehnjena abo higieniske twory. Trjebanu drastu abo črije pak lětsa njehromadža. Dalša móžnosć podpěranja su pjenježne dary, z kotrychž matej so transportaj financować kaž tež wšelake socialne zarjadnišća podpěrać. Přepokazać móža so na konto St.-Filomena-Verein e.V., IBAN: DE45 8559 0000 0372 6247 01 pola Ludoweje banki Budyšin e.G. pod hesłom „Hilfsaktion“.